

劉襄勤公奏稿

劉襄勤公（毅齋）奏稿

劉錦棠著

劉公

襄奏

勤稿

劉襄勤公奏稿卷七

起光緒十年四月訖八月

目錄

請 卹道員羅長祐並戰績事實 宣付史館摺
遵 旨統籌新疆情形以規久遠摺

哈密辦事協辦衙門員役暫照向章支廉片

新疆南路軍臺一律安設驛站酌擬經費章程摺

哈密巴里坤軍臺擬改驛站分段管理片

請 卹總兵何作霖並附祀忠壯專祠片

請更正湯彥和陳美仙官階片

酌裁馬步各營改併成旗並實存數目繕單立案摺

查明喀城底臺遞送摺件遲延片

請率師與法夷決戰摺

遵 旨酌度仍申前請摺

遵保各省籌餉人員並各督撫將軍關心協餉籲懇

恩施摺

懇 恩賞加張曜錫綸等頭品頂戴片

酌保關外諸軍出力人員摺

請一卹道員羅長祐並戰績事實 宣付史館摺

四月初三日

奏爲道員立功後積勞病故志節可傳籲懇

天恩俯准優卹建祠將戰績事實

宣付史館以彰忠藎而資觀感恭摺仰祈

聖鑒事竊統領湘軍二品頂戴按察使銜署甘肅阿克蘇
兵備道畱陝題奏道騎都尉世職訥齊欣巴圖魯羅長祐
上年患病累月經_臣給假在營調理遣醫診視入春後潮
熱自汗驚悸咯血等證層見疊出正月抄手書抵_臣言狀
條陳減除差徭未盡數事並舉替人有云死不足悲惟

國恩未報時事多艱伏枕飲泣不能自己尤殷殷以忠藎

相勗臣見其字迹欹斜語皆沈痛不忍卒讀因地方緊要
一時乏人接替該道員雖因積勞致疾而年力尙富冀能
將養復元是以未卽許其解任詎於二月初二日因病歿
於阿克蘇行營邊事需才正殷以南疆極稱得力之員竟
爾遽奪其算臣接報之餘不獨爲羅長祐悲更爲邊氓惜
也臣與羅長祐居同里閤稔知其幼時卽異凡童讀書過
目成誦能得其大旨師事原任陝西撫臣劉蓉嘗深器之
年二十仗劍遊浙繼度隴襄辦今大學士左宗棠營務肅
清關隴累功由通判保升花翎知府光緒元年臣奉檄由
西甯整旅進規新疆其時全疆淪陷日久冰天雪窖之地

險阻艱難聞者生畏幕客方紛紛求去羅長祐獨毅然請
行左宗棠素愛其才壯其氣委綜臣軍營務隨同出塞所
有臣軍糧事餉事運事兵事相機籌策罔不殫心二年六
月攻拔輯懷旣而迪化輦甯昌吉以次克復適臣染患時
疾甚劇暫駐迪化醫治遣羅長祐暨甯夏鎮總兵譚拔萃
提督董福祥等會攻瑪納斯城鏖戰兼旬繼而該逆哀詞
求撫羅長祐心知其詐稟商今伊犁將軍臣金順令其盡
繳馬械始允投誠縱令歸巢自決該逆旋率悍黨結隊出
城聲言赴營自投迨與我軍薄近仍復齊施槍礮挺矛直
前拌死衝突幸官軍先繞長壕埋伏截賊歸路地道齊轟

賊眾內外隔絕官軍合力圍剿賊目韓刑膿馬有才等伏
誅臣初心許羅長祐能勝將領之任於茲益信三年三月
攻克達坂城臣卽取道小草湖進攻托克遜別遣羅長祐
譚拔萃等乘勝趨吐魯番羅長祐謂安夷恟懼未定疾乘
之可迫走也夷逆奔則脅從之眾可不戰而勝遂促隊星
馳未至而該夷果棄城先遁纏土回子效順就撫悉免窮
治秋毫無犯一面宣諭

皇朝威德歡聲振地嗣仍隨臣移師南指且戰且前數月
之間遂將喀喇沙爾庫爾勒庫車拜城阿克蘇烏什葉爾
羌喀什噶爾各城池一律規復厥功爲多全疆肅清以道

員拜

賞穿黃馬褂雲騎尉世職

恩命旋蒙

特恩改爲騎都尉世職羅長祜益加感奮時以圖報不及爲懼四年十月安酋阿里達什噉其殘黨糾布魯特謀襲喀什噶爾臣時正值足痛大作力疾出師羅長祜自請前驅陣斬阿里達什逾年正月其餘黨阿布都拉哈瑪復勾結愛克木汗大舉寇邊臣親督馬步進駐烏帕爾以扼賊吭羅長祜由間道徑擣博斯塘特勒克賊巢直犁其庭赴機神速往往如此嗣是籌辦善後時與臣往復討論條舉

累千萬言其略云回疆積病在於差徭無制尤在頭目太多回性冥頑逐末輕本言語文字不通非乘建置之始改絃更張無能爲治請沙汰冗沓慎選賢能輕徭薄賦與民休息重農桑以正其趨興教化以植其本修內乃可攘外治法必賴治人所論均切時要故善後多資其議自_臣奉命接綰兵符駐師哈密檄羅長祜移紮阿克蘇操防之外凡中外交涉邊險要害種落性情習尚罔不運以精心旁諮博採洞燭底蘊用能通方應變操縱自如繼經_臣奏委署理阿克蘇道仍統湘軍時已因勞致疾強起從公去秋之季輕騎周歷轄境查察卡倫問勞撫輯殆無虛日茲二

月朔猶力疾巡防次晨由所部壽字馬隊肩輿回防所汗
出如注救治罔應臨終無一語及家私但云所志未竟負
國負知目不能瞑諭令官僚將佐照常治事守法奉公言
畢而逝

臣

維羅長祐才識閎通志節堅定與

臣

共役垂十

年不避艱險發縱指示必竭肫誠每臨巨寇輒帕首爲諸
將先決策制勝靡有遺遁故能戰勝攻取所嚮有功開誠
布公信賞必罰廉而有恩故能和輯將卒戰守兩資尤能
畱心時務通達治體事無鉅細必以躬親慘淡經營苦心
研究每發一論中邊俱透容有過當之處從無不及之處
臣常勸其稍稍節勞順時自衛然終習慣成性漫不經意

立功之由基於此致疾之由亦卽根於此矣左宗棠稱其文武兼資器識凝卓兩次奏請

天恩破格錄用

臣前遵

特旨保薦將帥謬附以人事

君之義將該道員登諸剡章蓋惟知之深故敢言之切推其志節才識擴而充之使天假之年更經歷練則其功業所就有未可以尋常限者時事多艱邊圉粗定臣以駑鈍忝膺重寄正賴二三同志相與維持贊助廣益集思今羅長祐年甫三十有七遽齎志以歿人才難得似此慷慨激昂敦尚志節饒有古劉崐祖逖風實一時邊材特出之選

也其在新疆戰績均經隨時奏明有案茲因積勞盡瘁志節可哀並據提督湯彥和等連銜稟稱羅長祐功在地方軍民感戴懇請具奏前來擬懇

天恩俯允從優

賜卹

准於新疆阿克蘇地方建立專祠並將其生前戰績事實宣付史館以彰忠藎而資觀感出自

鴻施除分別揀員接統湘軍署理阿克蘇道以重地方另案

奏明外所有道員立功後積勞病故志節可傳籲懇

天恩俯准優卹建祠將戰績事實

宣付史館以彰忠藎而資觀感各緣由謹據實臚陳伏乞
皇太后

皇上聖鑒訓示謹

奏

軍機大臣奉

旨另有旨欽此

遵一旨統籌新疆情形以規久遠摺

四月二十八日

奏爲遵

旨統籌新疆兵餉官制屯田情形並陳欠餉不可折發全疆宜聯一氣以規久遠恭摺仰祈

聖鑒事竊

臣

承准軍機大臣字寄光緒十年二月十七日

奉

上諭戶部奏西路軍餉浩繁急須統籌全局並詳籌未盡事宜各摺片近年部庫及各省庫倍形支絀而供億浩繁以西路餉需爲尤鉅似此年復一年殊非持久之道部臣通盤計算請飭統籌係屬顧念時艱力圖久遠起見著劉

錦棠金順張曜譚鍾麟按照該部所奏各節悉心區畫切實籌商將款項之應用應抵兵勇之應畱應汰務就左宗棠原議三百數十萬之餉量入爲出樽節開支以期經久而昭覈實定議後速行具奏原摺片均著鈔給閱看等因欽此跪讀之餘仰見

睿謨廣運下逮芻蕘莫名欽悚伏查新疆兵備向有旗綠之分旗則酌撥滿洲錫伯索倫之兵綠則酌撥陝西甘肅標路之兵或攜眷駐守或按期換防當時

廟算於各本營掛支額糧可免驟增新餉拓地周數萬里之遙兵不更添而防戍周匝棋布星羅北路郡縣而外以